

Na osnovu člana IV. 4.a) Ustava Bosne i Hercegovine, Parlamentarna skupština Bosne i Hercegovine, na 85. sjednici Predstavničkog doma, održanoj 18. septembra 2006. godine, i na 5. sjednici Doma naroda, održanoj 22. maja 2007. godine, usvojila je

**ZAKON**  
**O IZMJENAMA I DOPUNAMA ZAKONA O OSNOVAMA SIGURNOSTI SAOBRAĆAJA**  
**NA PUTEVIMA U BOSNI I HERCEGOVINI**

(Službeni glasnik BiH, broj 44/07)

Član 1.

(1) U Zakonu o osnovama sigurnosti saobraćaja na putevima u Bosni i Hercegovini ("Službeni glasnik BiH", broj 6/06) u članu 186. iza stava (4) dodaje se novi stav (5) koji glasi:

"(5) Vozačka dozvola neće se izdati ni produžiti njen rok važenja licu koje ima neplaćenu novčanu kaznu ili troškove prekršajnog postupka ili druge obaveze evidentirane u Registru novčanih kazni u skladu s važećim zakonima o prekršajima u BiH."

(2) Dosadašnji stavovi od (5) do (10) postaju stavovi od (6) do (11).

Član 2.

(1) U članu 208. iza stava (1) dodaje se novi stav (2) koji glasi:

"(2) Ne može se registrirati vozilo niti produžiti rok važenja registracije vozila čiji vlasnik ima neplaćenu novčanu kaznu ili troškove prekršajnog postupka ili druge obaveze evidentirane u Registru novčanih kazni u skladu s važećim zakonima o prekršajima u BiH."

(2) Dosadašnji stavovi od (2) do (5) postaju stavovi od (3) do (6).

Član 3.

(1) U članu 225. stav (1) riječi: "pravosnažnom sudskom odlukom" zamjenjuju se riječima: "prekršajnim nalogom, odnosno sudskim rješenjem".

(2) U članu 225. stav (3) riječi: "sudske odluke" zamjenjuju se riječima: "konačnog i izvršnog prekršajnog naloga, odnosno pravosnažnog sudskog rješenja".

Član 4.

(1) U članu 235. stav (1) iza tačke 33) dodaje se nova tačka 34) koja glasi:

"34) vozač koji se ne odazove pozivu nadležnog organa iz člana 222. osnovnog zakona radi dostave vozačke dozvole s ciljem izvršenja zaštitne mjere zabrane upravljanja motornim vozilom."

(2) Dosadašnja tačka 34) postaje tačka 35).

Član 5.

Član 242. mijenja se i glasi:

"Član 242.

Izdavanje prekršajnog naloga obavlja ovlašteno lice nadležnog organa za poslove kontrole i reguliranja saobraćaja na putevima u entitetima, kantonima i Brčko Distriktu Bosne i Hercegovine."

Član 6.

U članu 245. stav (1) mijenja se i glasi:

"(1) Trajanje zaštitne mjere zabrane upravljanja motornim vozilom računa se od dana deponiranja vozačke dozvole u skladu s članom 222."

Član 7.

- (1) Ovaj Zakon stupa na snagu osmog dana od dana objavljivanja u "Službenom glasniku BiH", a primjenjivat će se danom početka primjene Zakona o prekršajima.
- (2) Ovaj Zakon bit će objavljen u službenim glasilima entiteta i Brčko Distrikta Bosne i Hercegovine.

---

PSBiH broj 57/07  
22. maja 2007. godine  
Sarajevo

---

---

Predsjedavajući  
Predstavničkog doma  
Parlamentarne skupštine BiH  
**Beriz Belkić**, s. r.